



18. december 2008

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpuga:

1. Danmarkimi ilinniagaqartut kattuffiata, AVALAK-p kigutileritittarnermut tunngasunik ilaasortaminnik misissuisimanerat naalakkersuisut qanoq qisuariaateqarfigaat?
2. Danmarkimi ilinniagaqartortatta kigutaasa nakorsarneqartarnerat pillugu nunatsinni naalakkersuisut immikkut ittunik iliuuseqarnissamik pilersaaruteqarpat?
3. Illoqarfissuarni Københavnimi, Århusimi, Ålborgimi Odensimilu annerusumik ilinniagaqarniartut katersuuteqqapput. Naalakkersuisut pilersaaruteqarpat illoqarfinni taakkunani immikkut kalaallit ilinniagaqartut kigutileritittarnikkut nutaamik aaqqissuussiffigineqarnissaannik?
4. Naalakkersuisut massakkut pilersaaruteqanngippata siunissami nutaamik aaqqissuussinissamik pilersaaruteqassamaarpat?

(Juliane Henningsen, Inatsisartunut ilaasortaq, Inuit Ataqtigiit)

## **Tunngavilersuutit:**

Qulaani apeqqutigisannut tunngaviuvoq nalunaarut Danmarkimi kalaallit ilinniagaqartut kattuffiata AVALAK-p Danmarkimi ilinniagaqartut kigutileritittarnerannut tassungalu tunngatillugu immikkut annertuumik akissaajaateqartarnerannut tunngasoq. Nalunaarut ukioq manna aprilip aallaqqaataanniit 14-at ilanngullugu suliarineqarsimavoq.

Ukiuni kingullerni innuttaasut kigutimikkut peqqisuunissaat anguniarneqarpoq, Danmarkimili ilinniartut akissaqannginnertik pillugu ilaatigut kigusiarsinnaasanninnertik oqariatuutigivaat. Inuit Ataqtigiinnit isumaqarpugut Danmarkimi ilinniartunut aqutissiuussisinnaasariaqartugut.

Nalunaarummi ilaatigut nunatsinni naalakkersuisut saaffigineqarput, eqqarsaatigineqarsinnaasoq illoqarfissuarni Københavnimi, Århusimi, Ålborgimi Odensimilu kigutileritittarnermut tunngatillugu immikkut isumaqtigiinniartorqarsinnaasoq.